

**Nunatta imartaani angalasut tamarmik EPIRB-mik, piumasaqaatitut, peqalernissaat
anguniarlugu Naalakkersuisut naalagaaffimmut saaffiginnissuteqarnissaat pillugu**

Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen Jensen, Siumut)

pillugu

Sanaartornermut Ataatsimiititaliap

Siunnersuutip aappassaaneerneqarneranut

ISUMALIUTISSIISUTAA

Sanaartornermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqatigiit, Siulittaasoq

Inatsisartunut ilaasortaq Siverth K. Heilmann, Atassut, siulittaasup tullia

Inatsisartunut ilaasortaq Harald Bianco, Inuit Ataqatigiit

Inatsisartunut ilaasortaq Jens Kristian Therkelsen, Siumut

Inatsisartunut ilaasortaq Lars Poulsen, Siumut

UPA 2024-imi ulloq 23. april siullermeerinninnerup kingorna ataatsimiititaliap siunnersuut misissorpa.

Siunnersuutip imarisaa siunertaalu

Immakkut ajornartorsiortunik sukkannerusumik sumiiffisisinnaanissamik qulakkeerinninnissaq sivisuumillu ujaasinernut inuiaqatigiit aningaasartuutinik sipaarnissaat taamaalillunilu annannissamut periafissat annertunerulersinneqarnissat siunnersuummit siunertarineqarpoq. Imaani ajutoortoqartillugu sumiiffimmik eqqortumik nassiussisinnaasunik angallatit EPIRB-inik atortulorsorneqarnissaannik malittarisassanik aalajangersaasoqassasoq siunnersuuteqartoq isumaqarpoq.

Siunnersuutip Inatsisartunit siullermeerneqarnera

Siunnersuut partiinit amerlanerussuteqartunit taperserneqarpoq. Partii ataaseq, Demokraatit, inuit ataasiakkaarlutik nammineq sillimaniarnermut atortunik nammineq pisinissaminut

kissaateqarnertik qinersinnaasariaqaraat tunngavilersuutigalugu siunnersuutip itigartinneqarnissaa inassutigaat.

Siullermeerinninnermi inatsisitigut isumannaallisaanermut atortut EPIRB-iussanersut, imaluunniit allanik assingusunik nassitsisartunik pitsaanerusunik/akikinnerusunik aaqqiissuteqartoqassanersoq, inatsisitigullu piumasaqaatit taamaattut angallatinut tamanut imaluunniit taamaallaat angallatinut aalajangersimasunut atuutissanersut oqaluuserineqaqqaartariaqartoq oqaatigineqarpoq.

Tamanna tunngavigalugu siunnersuut ataatsimiitaliamit suliarineqartussanngorlugu ingerlatinneqarpoq.

Ataatsimiitaliap siunnersuummik suliarinninnera

Immakkut angalanermi isumannaallisaanermik sukannererulersitsiniartoqarnera taamaaliornikkullu annannissamut periarfissanik pitsangorsaaniartoqarnera ajutoortoqarneranilu pitsaanerusumik ujaasisoqarsinnaanissaanik qulakkeerinninniartoqarnera ataatsimiitaliamit nuannaarutigineqarpoq. Ullumikkut atortorissaarutitigut ineriaartortuarneq eqqarsaatigalugu immakkut angallannermk isumannaallisaanissamut aaqqiissutissaq ataasiinnaasariaqanngitsoq ataatsimiitaliaq isumaqarpoq. Inunnik pinngortitami sumiissusersisinnaasunik siunertamik qulakkeerinnissinnaasunik atortorissaaruteqarpoq assigiinngitsunik. Naalakkersuisut periarfissanik allanik misissuissasut ataatsimiitaliap kaammattutigaa, soorlu assersuutigalugu AIS aamma Spot, taamaattumillu imatut allannguutissatut siunnersuuteqarluni:

"Nunatta imartaani angalasut tamarmik EPIRB-mik assigisaanilluunniit, piumasaqaatitut, peqalernissaat anguniarlugu Naalakkersuisut naalagaaffimmut saaffiginnissuteqarnissaat pillugu Inatsisartut aalajangiiffigisassaattut siunnersuut."

Taamatut piumasaqarneq innuttaasut ilaannut aningaasatigut artorsartitsisinnaanera ataatsimiitaliamit ernummatigineqarpoq. Taamaattumik imaani angallatinut isumannaallisaanikkut atortussanik pissarsiniarnermi aningaasaqarnikkut tapiissuteqartoqarsinnaanersoq assigisaanilluunniit iliuuseqartoqarsinnaanersoq Naalakkersuisut sulinerminni misissussagaat ataatsimiitaliamit kissaatigineqarpoq.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Siunnersuutip piviusunngortinneqarnerani sillimaniarnermut atortunik pissarsinissamut innuttaasut aningaasartuuteqartussaasut siunnersuutip aningaasatigut kingunerisassaannik allaaserinninnermi takuneqarsinnaasoq ataatsimiititaliamit maluginiarneqarpoq.

Siunnersuutilli aningaasatigut kingunerisassaasa allaaserineqarneri amigartutut isumaqarfingineqarpoq. Taamaammat siunnersuutip piviusunngortinneranut allanik aningaasartuutinik nassataqarsinnaanera peqqissaartumik ataatsimiititaliamit nalilorsorneqarpoq. Tunngavagineqartut atuuttut naapertorlugit Naalagaaffiup Sinniisoqarfiata siunnersummik piviusunngortitsineranut ataqtigiissaarinermut ikorfartuinermillu AC-tut sulinermut inuup ataatsip ukiup affaanut akissarsiassaanut pisortat 250.000 kr.-it nalinginik aningaasartuuteqassapput.

Ataatsimiititaliap inassuteqaatai:

Allannguutissatut siunnersuut saqqummiunneqartoq akuerisassanngorlugu ataatsimiititaliamit inassuteqaatigineqarpoq.

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiitaliap siunnersuut aappassaaniigassanngortippaa.

Kristian Jeremiassen
Siulittaasoq

Siverth K. Heilmann
Siulittaasup tullia

Harald Bianco

Jens Kristian Therkelsen

Lars Poulsen